

SIMONIS PAVLI HILSCHERI

MEDICINAE DOCTORIS THEORETICES PROFESSORIS PVBLICI
ORDINARIJ

SERENISSIMIQVE DVCIS SAXO-GOTHANI ET ALTENBVRGENSIS
CONSILIARII AVLICI

H. T.

FACVLTATIS MEDICAE DECANI

P R O G R A M M A

DE

VERIS SALVBRITE
IN SPECIE

PVBLICAE INVITATIONI

AD

DISSERTATIONEM INAVGVRALEM

DE

NOXIIS QVIBVSDAM

CIRCA

MEDICAMENTA OFFICINALIA

D. XXXI. MAII HABENDAM
PRAEMISSVM.

IENAE D. XXVI. MAII M DCC XXXVIII.

LITTERIS CROEKERIANIS.



Q. D. B. V.

Prolusione, hanc proxime antecedente, temporis vernalis salubritatem & insalubritatem in genere nervose consideravimus: nunc autem de ipsius salubritate in specie pauca quædam commentandi nobis est animus.

Enimvero certo respectu non solum ab omnibus fere artis salutaris primiceriis, sed & ipsis poëtis ac philosophis vernum tempus saluberrimum pronuntiatur. Ex illis primo loco in medium producere par est DIVINVM SENEM, qui *Sect. 3. aphor. 9.* autumnus & veris inter se comparatione facta, inquit: Autumno morbi accidunt acutissimi fere. Ver contra saluberrimum est, minimeque funestum. Huic a latere ponimus nostrum olim Hippocratem Ienensem, B. WEDELIVM, qui in aphorismis aphorismorum prædictum aphorismum ita eleganter interpretatur: §. 4. Veris initia autumno apud nos æquiparantur, florentis temperies salubrior. §. 5. Ubi verno tempore constans tempestas & despumatio sanguinis perfecta fuerit, corpus salubrius degit; & §. 6. Morbi autumno provenientes respectu veris graviores & fixiores, vere facilius resurgente natura subiguntur.

Non

Non minus celeberrimus Confiliarius intimus Prussicus, FRIDERICVS HOFMANNVS, *Med. System. Tom. I. sect. 3. cap. 3. §. 6.* concinne veris salubritatem adstruit scribens: Tempus vernale, quo temperatior solis æstus aërem calefacit, salubritate omnibus reliquis anni partibus antecellit. E poëtarum autem numero unicum tantum laudabimus VIRGILIVM, istum poëtarum Latinorum principem, qui mirificum, quem vernum tempus corporibus subluharibus inspirat, vigorem, ceu insignis Physicus, Georgicorum Lib. II. perquam venuste cecinit:

*Ver adeo frondi nemorum, ver utile sylvis:
Vere tument terræ, & genitalia semina poscunt.
Tum pater omnipotens fœcundis imbribus æther
Conjugis in gremium lætæ descendit, & omnes
Magnus alit magno commissus corpore fœtus.
Avia tum resonant avibus virgulta canoris,
Et venerem certis repetunt armenta diebus.*

Poëta noster patrem omnipotentem verno tempore in lætæ conjugis gremium descendere scribens nihil aliud innuit, quam quod hoc tempore fluidum aëreo-æthereum, per quod Jovem seu patrem omnipotentem intelligit, majorem subtilitatis & elasticitatis gradum a radiis solaribus concentratis & perpendiculariter magis incidentibus consecutum, ac subinde fœcundis imbribus temperatum, non solum telluris seu Vestæ gremium penitus subeat, eiusdem succos commoveat, & in plantarum tubulos urgeat, sed & cum cunctorum animantium humoribus vitalibus intimius mixtum iisdem vegetiorem motum, fibris autem partium solidarum majorem simul conciliet elaterem, quibus his almæ naturæ præsidiis evenit, ut quævis vegetabilia læte germinant ac crescant,

pleraque vero animalia, hiberno torpore excusso, in aprium prorepant ac prodeant alacriora, venerisque stimulis agitata coeant, vel e quorundam saltem seminiis & ovis foetus excludantur, & ita eorum species multiplicentur. Atque hoc ipsum non solum in insectorum, piscium, avium, multorumque quadrupedum speciebus, sed & ipsa humana specie certo modo contingere quotannis observamus. Quis igitur tempus vernale lætum ac salubre pronunciare nolit?

Post hæc admodum præclare veris salubritas singularis ex eo elucet, quod permulti morbi, iique fere chronici, longe feliciorem admittant hoc tempore curam, quam autumnali vel hiemali præferunt. Confirmant hoc perspicue morbi, humorum crassitie ac visciditati, & inde sæpe productis in variis partibus ac visceribus obstructionibus suam debentes originem, exemplo mensium obstructionis, mali hypochondriaci, cachexiæ, paralyseos, luis venereæ nec non febrium intermittentium, aliorumque. Etenim quando fluidum aëreo-æthereum, quod, per dicta atque nota, vernali tempore sensim sensimque subtilioris, mobilioris ac expansivæ magis indolis fit, cum humoribus nostris vitalibus, variis modis miscetur, motu concitatori, quem eorum particulis imprimit, hæc magis, quam par est, cohærentes divelluntur, adeoque earum visciditas magna ex parte infringitur, ut ideo, simul adhibitis pharmacis, humores viscidos corrigentibus ac educantibus, nempe aperientibus, incidentibus, abstergentibus, diaphoreticis, diureticis, purgantibus & p. r. n. salivatoriis ipsis, allegati morbi longe facilius curentur, quam vel autumno, vel hieme; ceu quibus anni
tempo-

temporibus in dies humores fixiores fiunt, adeoque ad secretionem & excretionem particularum impuriorum e sinu suo non tam bene dispositi. Atque hinc est, quod his anni partibus ad sanitatem amis-
sam recuperandam adeo necessarium transpirationis insensibilis negotium non adeo bene succedat, unde febrium intermittentium diuturnitas potissimum derivanda est.

Eminet porro veris salubritas ex hoc quoque phænomeno, quod naturæ vigor in sat multis subiectis, hac potissimum anni portione, humorum tum quantitate tum qualitate peccantium evacuationes quasi críticas non raro instituat, iisdemque corpus a variis gravioribus morbis salvum præstet, id ipsum diarrhoeis benignis, sanguinis profluviiis e naribus nec non scabie benigna præsertim evincitibus.

Præter istam clementem ac temperatam aëris indolem, felicibus morborum curis insigniter faventem, floridum ver quibusdam etiam morbis multum affert præsidii ac solaminis, dum alma tellus succo vegetante turgidas protrudit plantas, quæ recenter adhibitæ variis in morbis longe salubriorem opem præstant, quam si prius siccatae non adeo parum virtutis in auras dispersere. Non minus vaccæ, capræ atque asinæ herbido vere recens germinantibus ac salutiferis herbis pastæ lac atque butyrum longe salubrius largiuntur quam quacunque alia anni parte.

Tandem & saluberrimum vernale tempus pronunciandum est, cum eodem ob benignam aëris temperiem commodissime in locis amoenis fiat corporis motio, & itinera sanitatis gratia in loca salubria suscipiantur, nec non thermarum ac acidularum usus cum fructu instituitur. Etenim hac ratione non

solum motus corporis & aquæ medicatæ vim medicamentosam exerunt, sed simul aër temperatus, sulphure balsamico gemmarum ac florum arborum atque herbarum foetus, mirifice corpus recreat.

Ex his igitur huc usque recitatis insignem veris salubritatem satis perspicuam esse putamus. Hæcce præfandi nobis occasionem dedit Disputatio inauguralis clarissimi & dignissimi Medicinæ Doctorandi,

SIGISMVNDI IACOBI HOCHSTETTERI,

de cujus laudabili vitæ & studiorum ratione nunc est exponendum: Natus est anno hujus sæculi VIII. die XX. Julii, patre viro plurimum reuerendo M. FRIDERICO IACOBO HOCHSTETTERO, Burgstalli in Ducatu Wurtembergico V. D. ministro vigilantissimo, matre VRSULA MARGARETHA, e celebri gente Hegeliana prognata, matrona optima. Ast non licuit *Nostro* diu dulci parentum amore atque cura frui, nam anno ætatis tertio beato parentis, & triennio post, matris præmature obitu orphanus factus; quare opus erat, ut alii parentum vices & educationem susciperent. Primum igitur amantissime hoc præstabat ipsius patruus honoratissimus, Dn. HOCHSTETTERVS, tributum Stuttgardiensis collector, & Xenodochii, quod ibi gratiose sustentatur, curator meritissimus. Post hujus obitum, curas has in se recipiebat Vir maxime reverendus, illustris Gymnasii Stuttgardiani Professor Publ. postea vero Rector, & demum Abbas Murrhadinus HOCHSTETTERVS; atque hunc demum in præclaro *Nostro* benefaciendi munere excipiebat Vir maxime reverendus, in diœcesi Duttlingensi sacrorum supremus Antistes meritissimus HOCHSTETTERVS. Huic optimæ agnatorum trigæ, inter cœlites jam splendenti, maximas adhuc habet grates, quia præter veræ religionis fundamenta etiam latinam linguam ut probe addisceret, strenuam gerebant curam, sic ut varios, præsertim

tim III. Gymnafii Stuttgardiani præceptores, ob fingularem instructionis fervorem atque induftriâ, five inter vivos ſint, five inter mortuos, adhuc pie veneretur. Poſtquam annum XIVtum conſecutus erat, præpoſiti curabant, ut Dn. WEYHENMAIERO civitatis Winnendæ conſuli meritiffimo, & artis pharmaceuticæ peritiffimo ad eandem addiſcendam traderetur. Præterlapſo luſtro ad exterâs provincias abire & officinâs pharmaceuticâs, majores in arte ſua proſectus conſecuturus viſitare ſe cum conſtituebat; hinc diverſis in locis celebrioribus, Nordlingæ nempe, Herbipolis, Heidelbergæ, atque in civitate nova Gallica, quæ Caſellis Haſſiacis floret, officinâs inſtructiſſimas per aliquot annos perluftrauit; tandem & Hammonæ nec non Suſati Gueſtphalorum per integrum triennium in celebribus officinâs ſic dicti Proviſoris munere functus eſt. Vita ſic ad plures annos apud exteros acta ei licuit multas inclytas Germaniæ, imo & nonnullas ipſius Belgii urbes adire, & tum ad magiſtratus rationem, tum incolarum mœurs, aliæque notabiliora attendere. Poſt tam multiplices quaſi proluſiones ſtudio medico ſeſe applicare ſibi propoſuit: ideo ad celeberrimam noſtram Salanâ anno 1735. ſe conuertebat, atque a me t. t. faſces Academicos gerente in numerum ſtudioſorum receptus fuit. Poſtea diligentiffime in ſtudia Academica incubuit & ſub ductu Clariffimorum magiſtrorum Dn. CAROVII & Dn. DARRIES Logicam, Excellentiſſimi philoſophiæ Profeſſoris Dn. D. STÖCKII Arithmeticam, tam literariam quam numeroſam; illuſtris vero Conſiliarii Aulici & Phyſic. ac Medicin. Prof. Dn. D. HAMBERGERI Phyſicam pertractavit; Cujus etiam prælectiones medicas, Phyſiologicas, Pathologicas, Semioticas & Chirurgicas ſedulo auſcultavit, atque ipſius demonſtrationes anatomicas priuatas & aliquot ſectiones judiciales cum fructu attentus vidit.

Illuſtrem & Magnificum Conſiliarium Aulicum ac Med. Profeſſorem Dn. D. TEICHMEYERVM, hoſpitem ſuum pie venerandum, audivit ſolide exponentem Phyſicam, Materiam

teriam Medicam, & Chirurgiam; publice vero Botanicam, Osteologiam, Myologiam, & Angiologiam: ipsius etiam spectator fuit, quando in theatro anatomico bina cadavera pereleganter dissecuit & aliquando sectionem judicalem dextre administravit. Non minus e doctissimis recitationibus, quas Illustris & Magnificus Consiliarius Aulicus & Med. Professor Dn. D. WEDELIVS, Facult. nostræ Senior venerabilis, habuit, privatim ad institutiones & universam praxin, ac publice ad doctrinas de febribus, inflammationibus, doloribus, obstructionibus & fluxionibus, insignes Candidati nostri profectibus factæ fuerent accessiones. Me laudabili industria sectatus est, quando Physiologiam, Pathologiam & Diatam vel publice vel privatim docui: sicut idem quoque fecit, quando Experientissimus Dn. D. TANNENBERGERVS Semioticam prælegit.

Cum itaque indefesso studio ac moribus honestissimis non solum sibi laude dignissimos in arte medica comparauerit profectus, sed & omnium suorum præceptorum fauorem: ideo ad petitionem decenter factam eum eo lubentius inter medicinæ Candidatos recepimus. Receptus, in examinibus eos nobis profectus sufficienter probavit, quos de ipso sperauimus & jam laudavimus, atque propterea etiam facile obtinuit a nobis licentiam *dissertationem inauguralem* proprio Marte elaboratam, de NOXIIS QVIBVSDAM CIRCA MEDICAMENTA OFFICINALIA, die XXXI. Maji sub præsidio TEICHMEYERIANO habendi.

Huic actui solenni ut Magnificus Prorektor, illustrissimi S. R. I. Comites, Procures Aulæ & Academiæ venerandi, Hospites & almæ artis fautores omnium ordinum honoratissimi gratiosam & benevolam præsentiam commodare dignentur, perofficiose & amice oro rogoque. P. P. sub sigillo Facultatis M DCC XXXVIII.

D. XXVII. Maji.

(L. S.)